

---

# PERDIGON.

---

## I.

**B**EN aio 'l mal e l'afan e 'l cossir  
Qu'ieu ai sufert longamen per amor,  
Quar mil aitans m'en an mais de sabor  
Li ben qu'amors mi fai aras sentir,  
Quar tan mi fai lo mals lo ben plazer  
Que semblans m'es que, si lo mals no fos,  
Ja negus bes no fora saboros;  
Doncx es lo mals melhuramen del be  
Per q'usquecx fai a grazir quan s'ave.

A fin' amor grazisc lo dous dezir  
Que m fai estar en tan fina dousor,  
Que non es mals de que m sentis dolor,  
Si totz lo mons mi jutjava a murir;  
Et aia m grat merces que m fetz voler  
A la belha de cui fatz mas chansos,  
Qu'ieu li m donei, et anc tan no m plac dos;  
Quar qui m dones tot lo mon per jasse  
No m plagra tant com quan li donei me.

En amador pogra miels avenir,  
Tant a de pretz, de sen e de valor,

Qu'ilh s'en dera ab mout mais de ricor;  
Mas als auctors ai ancse auzit dir  
Qu'en ben amar em quascus d'un poder;  
Et hom paubres hi fai meillurazos,  
Quant es de sen, contra 'l ric cabalos,  
Qu'aitan com a meyns de rictat en se,  
Tan grazis mais qui l'honra ni 'l mante.

E fin'amors no manda ges chاوزir  
Comte ni rey, duc ni emperador,  
Mas fin amic e ses cor trichador,  
Franc e leyal, e que s gart de falhir;  
E qui non sap aquestz ayps mantener  
Paratge aunis, e si mezeis met jos,  
Per qu'en amar non es valens ni bos;  
Qu'en paratge non conosc ieu mais re,  
Mas que mais n'a selh que mielhs se capte.

Fis Jois Honratz, pus tan vos faitz grazir,  
Per amor dieu, aissi doblatz l'onor  
Que m retenguatz per leyal preyador,  
E no vulhatz escoutar ni auzir  
Fals lauzengiers qu'en amor dechazer  
Ponhon totz temps, tant son contrarios;  
E vos faitz los morir totz enoios:  
Si col pechat estenh hom ab merce,  
Estenhetz elhs, quar per elhs no m recre.

Aitan sapchatz, s'ieu ja ren cug valer,  
Mo senher Nuc del Baus, qu'es enveios

De tot quan tanh a fin pretz cabalos,  
Mi fai cuiar qu'ab tal gaug mi rete,  
Cum s'er' ieu pretz qu'elh ama mais que re.

De Monpeslier vai ben a Mon Plazer,  
Qu'el senher es francs et humils e bos,  
Et en sos faitz es d'aital guizerdos  
Qu'el honra dieu, et tot bon pretz mante,  
Per qu'el lo creis e l'enanssa e l' soste.

.....

## II.

AISSI cum selh que tem qu'amors l'aucia,  
E re non sap on s'esconda ni s'guanda,  
Met mi meteys en guarda et en comanda  
De vos qu'ieu am ses gienh e ses bauzia,  
Quar mielher etz del mon e la belaire;  
E si amors mi fai vas vos atraire,  
Si be m folhey, no cug faire folhia.

Qu'aissi m'aven, dona 'l genser que sia,  
Q'us deziriers, qu'ins en mon cor s'abranda,  
Mi conselha, e m ditz que us serva e us blanda,  
E vol que m lais de sercar outra via  
Per vos ab cui tug bon ayp an repaire;  
E pus amors no vol que m vir ni m vayre,  
Si m'aucizetz, no cug que be us estia.

Essenhamens e pretz e cortezia  
Trobon ab vos lur ops e lur vianda,  
E non devetz, s'amors no us es truanda,  
Merce lunhar de vostra companhia,  
Qu'ie us clam merce tot jorn cum fis amaire;  
E si merces ab vos non a que faire,  
Ma vida m val trop meyns que si moria.

Pero vers es que per ma leujaria  
Vuelh mais puiar que drechura no manda,  
Qu'ieu tenc lo pueg, e lays la plana landa;  
E cas lo joy qu'a mi non tanheria,  
Qu'amors me ditz, quant ieu m'en vuelh estraire,  
Que manthas vetz puei' om de bas afaire,  
E conquer mais que dregz no'l cossentria.

Juli Cezar conquis la senhoria  
De tot lo mon tan cum ten ni garanda,  
Non ges qu'el fos senher ni reys d'Irlanda  
Ni coms d'Angieus ni ducx de Normandia,  
Ans fon hom bas, segon qu'auzem retraire;  
Mas quar fon pros e francx e de bon aire,  
Puget son pretz tan quan puiar podia.

Per que m conort enquer, s'ieu tan vivia,  
Qu'aia de vos so que mon cors demanda,  
Pus us sols hom ses tor e ses miranda  
Conquis lo mon, e l'ac en sa baylia,  
Aissi ben dey, segon lo mieu veiaire,

De vostr' amor de dreg estr' emperaire,  
Cum el del mon ses dreg que no y avia.

Domna valentz, corteza e de bon aire,  
No us pes, s'ieu sui ses gienh e ses cor vaire,  
Quar esser deu so qu'amors vol que sia.

-----  
III.

Tot l'an mi ten amors de tal faisso  
Cum esta selh qu'a 'l mal don s'adormis,  
E morria dormen, tant es conquis,  
En breu d'ora entro qu'hom lo rissida,  
Atressi m'es tal dolor demezida  
Que m don amors, que sol no sai ni sen,  
E cug morir ab aquest marrimen  
Tro que m'esfors de far una chanso  
Que m rissida d'aquelh turmen on so.

Be m fetz amors l'usatge del lairo,  
Quant encontra selhui d'estranh pahis,  
E 'l fai creire qu'alhors es sos camis,  
Tro que li dis : « Belhs amicx, tu me guida. »  
Et en aissi es manta gens trahida  
Qu'el mena lai on pueis lo lia e 'l pren ;  
Et ieu puesc dir atressi veramen  
Qu'ieu segui tant amor com li saup bo,  
Tan mi menet tro m'ac en sa preizo.

E te m lai pres on no truep rezemso  
Mas de ma mort, qu'aissi lor abelhis  
Entre mi dons et amor cui sui fis;  
Lor platz ma mortz e lor es abellida,  
Mas ieu sui selh qui merce no lor crida,  
Aissi cum selh qu'es jutgatz a turmen,  
Que sap que pois no ill valria nien  
Clamar merce, aia tort o razo,  
Per qu'ieu m'en lais que mot non lor en so.

Pero no sai qual me fass' o qual no,  
Pus per mon dan m'enguana e m trahis  
Amors, vas cui estau totz temps aclis  
Al sieu plazer, qu'aitals fo m'escarida;  
E tengr' o tot a paraula grazida,  
Si no m mostres tan brau captenemen;  
Mas se aunis pel mieu dechazemen,  
Be fai semblan que m'aia 'l cor fello,  
Que per mon dan no m tem far mespreizo.

E fas esfortz, s'ab ira joy mi do,  
Quar en aisso m conort e m'afortis  
Contra 'l dezir en qu'amors m'a assis,  
Aissi cum selh qu'a batalha remida,  
Que sap de plan sa razos es delida,  
Quant es en cort on hom dreg no 'l cossen,  
Et ab tot so se combat eyssamen,  
Me combat ieu en cort e no m ten pro,  
Que amors m'a forsjugjat no sai quo.

Ai! Bel Esper, pros dompna issernida,  
Tan gran dreiz er, si d'amor mal m'en pren,  
Quar anc de vos mi parti las! dolen,  
Per tal una que ja no m tenra pro,  
Ans m'aucira en sa dolza preiso.